

ուլերը եւ գառները: Մարօն բաժանեց նրանց հաց եւ պանիր, որ բերել էր իր հետ: Փոքրիկ հովուհիքն ուրախութեամբ ընդունեցին առատ նտերը բարերար ձեռքից եւ իսկոյն սկսեցին ուտել:

Ես խօսեցրի մէկին, որին Մարօն կոչում էր Դիբօ:

– Ի՞նչ կանես, եթէ գայլը քո գառներից մէկը գողանայ:

– Սօրօն չի թողնի, – պատասխանեց փոքրիկ հովուհին, խոժոռած աչքերով նայելով իմ երեսին:

– Ո՞վ է Սօրօն:

Նա փոխանակ պատասխանելու, երեսը շուռ տոեց, եւ մատները բերնին դնելով, շոացրուց: Ժայռերի ետեւից յայտնուեցաւ կապտագոյն շուն, որ մագոտ պոչը թափ տալով, վազեց Դիբոյի մօտ եւ խորին մտերմութեամբ սպասում էր նրա հրամանին:

Տեսնելով գազանին, ես ետ քաշուեցայ:

– Մի՛ վախիր, – քաջալերեց ինձ Դիբօն: – Սօրօն կ'ասեմ՝ քեզ չկծէ:

Ես ծիծաղեցայ: Մարօն գրկեց Դիբօին, համբուրեց նրա այրոած թշերը:

– Այստեղից մենք կը բաժանուենք, – դարձայ ես դէպի Մարօն:

– Կուզե՞ս, քեզ կը տանեմ մինչեւ Խանա-սորի ձորը, – ասաց նա ուրախ դեմքով: – Վախենում եմ ճանապարհը կորցնես:

Ես պատասխանեցի, թէ այդ խիստ դժուար կը լինէր նրա համար, որովհետեւ արեգակն արդէն սկսել էր այրել, եւ ինդրեցի միայն ցոյց տալ, թէ ո՞ր կողմից պետք է գնալ: Նա այնպիսի ճշտութեամբ նկարագրեց ճանապարհի ընթացքը, մինչ ես մտածում էի, թէ աչքերս խփած կարող եմ գնալ: Երեւում էր, այն լեռների բոլոր շաւիղները, իրանց պտոյտներով, իրանց ելեւէջներով նրան ծանօթ էին: Նա գիտէր իւրաքանչիւր ժայռերը, աղբիւները, առոակները: Նա ճանաչում էր մինչեւ անգամ նշանաւոր թուփերը:

Ես հեռացայ: Մարօն երկար կանգնած «Ճակ-քարի» գլխին. հետագօտում էր իմ գնացքը, մինչեւ բլուրները թաքցրին իմ տեսութիւնից նազելի դեմքը:

### ԺԷ. ԵՐԿՈՒ ՈՐՍ ՄԻԱՍԻՆ

Արեգակն արդէն բարձրացել էր իւր կէսօրեայ տեղը, նրա այրող ճառագայթները, հանդիպելով սարերի հովութեանը, թուլանում էին, կորցնում էին